

红楼梦诗歌集锦菊花诗导游资格考试 PDF转换可能丢失图片或格式，建议阅读原文

https://www.100test.com/kao_ti2020/633/2021_2022__E7_BA_A2_E6_A5_BC_E6_A2_A6_E8_c34_633845.htm 忆菊-蘅芜君怅望西风抱闷思,蓼红苇白断肠时。空篱旧圃秋无迹,瘦月清霜梦有知。念念心随归雁远,寥寥坐听晚砧痴。谁怜我为黄花病,慰语重阳会有期。种菊-怡红公子携锄秋圃自移来,篱畔庭前故故栽。昨夜不期经雨活,今朝犹喜带霜开。冷吟秋色诗千首,醉酹寒香酒一杯。泉溉泥封勤护惜,好知井径绝尘埃。供菊-枕霞旧友弹琴酌酒喜堪俦,几案婷婷点缀幽。隔座香分三径露,抛书人对一枝秋。霜清纸帐来新梦,圃冷斜阳忆旧游。傲世也因同气味,春风桃李未淹留。画菊-蘅芜君诗余戏笔不知狂,岂是丹青费较量。聚叶泼成千点墨,攒花染出几痕霜。淡浓神会风前影,跳脱秋生腕底香。莫认东篱闲采掇,粘屏聊以慰重阳。簪菊-蕉下客瓶供篱栽日日忙,折来休认镜中妆。长安公子因花癖,彭泽先生是酒狂。短鬓冷沾三径露,葛巾香染九秋霜。高情不入时人眼,拍手凭他笑路旁。菊梦-潇湘妃子篱畔秋酣一觉清,和云伴月不分明。登仙非慕庄生蝶,忆旧还寻陶令盟。睡去依依随雁断,惊回故故恼蛩鸣。醒时幽怨同谁诉,衰草寒烟无限情。访菊-怡红公子闲趁霜晴试一游,酒杯药盏莫淹留。霜前月下谁家种,槛外篱边何处愁。蜡屐远来情得得,冷吟不尽兴悠悠。黄花若解怜诗客,休负今朝挂杖头。对菊-枕霞旧友别圃移来贵比金,一丛浅淡一丛深。萧疏篱畔科头坐,清冷香中抱膝吟。数去更无君傲世,看来惟有我知音。秋光荏苒休辜负,相对原宜惜寸阴。咏菊-潇湘妃子无赖诗魔昏晓侵,绕篱欹石自沉音。毫端蕴秀临霜写,口齿噙香对月吟。满纸自怜题素怨,片言谁解诉秋心。一从陶令平

章后,千古高风说到今。问菊-潇湘妃子欲讯秋情众莫知,喃喃
负手叩东篱。孤标傲世偕谁隐,一样花开为底迟?圃露庭霜何寂
寞,鸿归蛩病可相思?休言举世无谈者,解语何妨片语时。菊
影-枕霞旧友秋光叠叠复重重,潜度偷移三径中。窗隔疏灯描远
近,篱筛破月锁玲珑。寒芳留照魂应驻,霜印传神梦也空。珍重
暗香休踏碎,凭谁醉眼认朦胧。残菊-蕉下客露凝霜重渐倾欹,
宴赏才过小雪时。蒂有余香金淡泊,枝无全叶翠离披。半床落
月蛩声病,万里寒云雁阵迟。明岁秋风知再会,暂时分手莫相思
。相关链接：红楼梦诗歌集锦金陵钗红楼梦诗歌集锦黛玉葬
花词红楼梦诗歌集锦大观园题咏红楼梦诗歌集锦咏柳 100Test
下载频道开通，各类考试题目直接下载。详细请访问
www.100test.com